

清名家詞



寒詞

松

閣

運彰



本书根据开明书店1937年初版复印

清 名 家 词

陈乃乾辑

上海书店印行

(上海福州路401号)

上海市印刷七厂印刷

开本 787×960 毫米 1/32 插页 1 印张 212 1/4

1982年12月第一版 1982年12月第一次印刷

印数 1 - 10000 精装全十册

J 45 · 1 定价 26.00元

張鳴珂（道光九——光緒三四）

原名國檢。字公束。一字玉珊。浙江嘉興人。同治辛酉拔貢。卽選訓導。官至江西知縣。嘗受業于全椒薛時雨。海鹽黃燮清。所作詞以婉麗稱。李慈銘譚獻交推之。著有寒松閣集。

序一

詞雖小道。不善學者不能爲。爲之亦不能工也。橋李詞藪也。自朱竹垞太史李秋錦徵君開其先。數十年尋聲摺譜。不乏其人。所爲詞雖薄不浮。雖淺不俚。有清空婉約之致。無肥澤浮靡之習。師程具在。律呂精嚴。良可慕也。張君玉珊家橋李。年纔弱冠。雅好譜詞。著有秋風紅豆樓詞鈔。一日寄予索序。讀之以溫李之才。寫纏綿之格。春情豐繁。秋思往復。筆意最近靜志居。予素喜填詞。酒邊燈下。雁晚花前。每有感託。付之倚聲。今讀玉珊詞。不禁有觸予好。明年春水生時。當袖我笛譜。載雛鬟。泊舟鴛鴦湖畔。與君賭唱紅牙數拍也。咸豐紀元醉司命前五日。桐鄉馬蘭芬拜手序。

序二

夫以珂雪鬱鬱。把梅邨之袖。竹垞朗朗。拍飲水之肩。姜張吳史。商羽流徵之音。溯厥遺風。實在長水。蓋樂府之職志。而倚聲之林淵也。吾友嘉興張公束。陶靈碧山。標體白石。攝梅谿之秀。而芟其蕪。翫夢窗之奇。而割其類。先哲可作。後來交推。結交十五

六年。唱予數十百調。公束以稚圭楊藥。不佞以止庵津逮。以爲樹比興於慢令。通絃雅於犯引。譬之染黛妝蛾。短長入鏡。成塵拂麝。冷暖皆香。琴緒分明。酒鄉棲逸。抑亦磊落如昔。顰笑無端者已。公束去年賦春柳四詩。傳唱東南。身世之感。民物之故。託興如見。而械詞可通。予閱歲乃始和之。折腰淪落。拄笏偃蹇。同心離居。兩刀一鞘。斯敬通孝標。各當自序可乎。審定公束詞卷。附以評之。譚獻撰。

序三

古不云乎。詩三百篇。大抵聖賢發憤之所爲作也。夫人苟非不得已。殆無文字。卽填詞亦何莫不然。浙西之詞。以小長蘆釣師爲職志。其生平減儉宗旨。備見於自題詞集之中。以彼飄零桑海。蕭索高門。夜別酒徒。朝瞻兵氣。此何景邪。舟唇馬背。水曲山椒。北風淒其吹人。饑烏昏而啄屋。此何地邪。引商刻羽。其第求派別邪。其第美音節邪。夫固有迫之於初幹之於內者矣。君生長詞人蒼萃之鄉。濡染已非尋常。又得韻甫黃氏爲之導師。卷首所載商榷諸言。可藥末派。可起正宗。故君所涉筆。銅簧新炙。

無其脆。彈丸脫手。無其靈。初寫黃庭。神與體會。知者皆能道之矣。憶予經南昌郭外。晤君於野寺。四壁黤黯。小窗微明。君獨據一案。校乙淮南鴻烈解。細楷流麗。如珠走盤。蕭然不自知。聽鼓應官爲何事。乃嘆人惟能甘淡泊之境。始有情至之言。情愈至。品愈高。詣愈深。蘊抱愈厚。激發愈雄。將得已邪。不得已邪。然則君之詞。殆其嚆矢耳。予於詞。旣孱學。又多意造。況復聞見蒼涼。知交零落。才華旣退。結習遂除。棄置不講久矣。今讀君詞。又不禁怦然有動於中。惜乎相逢之已晚也。異日者。落月在梁。碧雲舒卷。若有作天風海濤之音。唱玉宇瓊樓之句者。其殆君乎。光緒甲申冬月。長樂弟謝章铤。

寒松閣詞

嘉興張鳴珂玉珊

南浦 春水用山中白雲詞韻同褚少梅紹叢徐金坡變賦

谿雨夜廉纖。趁東風、著力溶溶流曉。新漲漸平隄。垂楊外、一帶林塘如掃。偷窺鏡面、
理妝十五漁娃小。南浦那時、曾賦別腸斷。綠波春草。年年開徧桃花。數江鄉又是、
鱖魚肥了。杜若暗生香。汀洲畔、可有褰芳人到。煙波杳渺。滿裙佇立風前悄。回首畫
船天上坐。載得落紅多少。

江城子

紅藕花殘小苑涼。一泓秋水香。倚迴廊。生疏樓閣。何處捉迷藏。魂斷隔簾鸚鵡語。歸
去也。沒商量。

倦尋芳 春光欲去雨意垂垂於紅稀綠暗中翳燈賦此時夜寒特甚彌益淒
戾矣

寒松閣詞

柳絲蘸雨。苔暈生煙。庭院催暝。悄揜窗紗。窗外妒花風勁。紅藥翻階春欲去。碧桃窺戶寒猶凝。最銷魂。是梁閒紫燕。一雙低並。歎芳事。那堪重省。萍絮三生。飄蕩無定。淺夢梨雲。又被杜鵑驚醒。簫局撥殘蘭麝火。牆陰閒煞鞦韆影。料天涯。卷湘簾。翠鬟慵整。

疏影 少梅索題梅花仕女幅用石帚韻

冰蟾映玉。有耐寒老鶴。苔際棲宿。底事宵深。不管清愁。高樓起弄橫竹。巡簷索共梅花笑。儘倚徧。枝南枝北。彈晚妝。鬢影如煙。伴取瘦痕幽獨。還憶江鄉舊事。綺窗試問訊。纖蕊搖綠。渺渺天涯。酒醒羅浮。夢墮荒寒蘿屋。何郎漸老。風情懶。已忘卻。玉臺歌曲。待翦燈。重喚春魂。賸有冷香盈幅。

高陽臺 醉司命日燈下讀又雲繼振五湖煙艇題贈集賦此用穀人集中祀

竈日題詹石琴詞卷韻

燭豔燒春。錫香煮凍。荒村景偏殘年。一卷新詩。攜來展向梅邊。分明醒了羅浮夢。勝

鬢絲輕颺茶煙。伴疏窗、一穗寒燈。好證情禪。幽懷欲共瑤琴語。把淒涼心事。付與鷗絃。我亦多愁。夜深冷抱青氈。人閒縱有雙紅豆。又雲見贈詩有人閒。只賸雙紅豆。我欲平分故憫公之句。寫相思。難盡豪顚。漸冰漸暗。結谿流。阻斷魚箋。

疏影 黃硯北丈仁家篠峯鴻卓雷約軒葆廉舉嬉春詞社約賦春影

玲瓏碎玉。是舊時月色。移到蘿屋。檻外疏梅。相約今宵。橫斜寫上綃幅。湘簾十二低垂地。漾澹澹。波紋如縠。看鬢邊。一縷煙飛。小鼎雨前茶熟。猶記鞦韆架畔。海棠睡未醒。偷照紅燭。剗機歸來。慵整殘妝。鏡裏脩蛾微蹙。銀燈莫粲雙蕉朵。怕不見。倚闌人獨。最可憐。捉搦楊花。譜入笛家新曲。

聲聲慢 春聲嬉春詞社分賦

錫簫宛轉。社鼓喧闐。愔愔節近清明。燕妬鶯嬌。朝來似報新晴。街頭賣花人到。喚梨雲。殘夢恹惺。卷簾看。怕生紅飛墮。繫箇金鈴。記否尋芳陌上。共個儂門草。釧觸琤琤。天半鳴絃。誰家穩放風箏。新詞柳枝賭唱。隔花陰。防有人聽。愁又是。替催歸。鷓鴣語。

未停。

菩薩蠻

重來人似雕梁燕。尊前不分長相見。相見背銀釭。影兒成一雙。分明閒坐久。那得長相守。相守奈今宵。春愁上下潮。

憶舊遊

乙卯秋客武林晤餘杭郎夔亭。瑞載酒湖上。極筆硯翠尊之樂。青山無恙。紅鯉書稀。忽忽已二年矣。今夏訪予春波釣屋。相見歡甚。別又匝月。譜此寄懷。

記湖脣覓影。水榭招涼。款語西風。小艇沿波去。正初荷過雨。墜粉飄紅。叩舷段家橋側。題吧句玲瓏。恨客裏光陰。提鵬挈鷺。都是萍蹤。怱怱臥游處。認扇底煙鬟依舊。溟濛。於西湖鷗舫中。爲予寫山水便面。最怕鷗盟冷。向鴛鴦湖上。重繫詩篷。酒醒故人何處。零落翠尊空。待小疊銀箋。愁心寄與雲外鴻。

浣谿紗 秋夜夢中得鷗鵠句。曉起足成之。

菡萏紅彫小苑秋。嫩涼人倚水邊樓。半簾花雨鷓鴣愁。羅帕題香留鏡檻。玉釵分影入茶甌。畫眉纔罷看梳頭。

齊天樂 游查氏竹素園

菱波新漲銀塘淨。園林已消殘暑。粉墜蓮房。香飄桂叢。秋在梧桐庭宇。牆陰過雨。正薄靄初收。溼煙堆樹。一角頽峯。翠痕猶畫舊眉嫵。淮南招隱賦罷。任蒼苔踏徧。游屐來去。壞塔窺窗。孤亭枕水。多少珠簾瓊戶。繁華易阻。甚蕭瑟蘭成。慣商愁句。壁間有蠟紅主人題句甚悽婉。付與階前亂蛩深夜語。

又 褚二梅榮槐歸自東臺出始游集屬校爲賦此解

江山洵美非吾土。登樓最憐王粲。彈鋏歌魚。揮豪倚馬。儘把閒愁消遣。淒迷淚眼。看戰壘蕭蕭。綠蕪春滿。落日荒城。暮笳幽抑和哀怨。天涯多少俊侶。悵鸞飄鳳泊。離緒誰綰。廿四橋邊。十三河上。題徧兜娘團扇。柔腸易斷。甚芳草年年。故鄉歸晚。好約盟鷗。翠尊留醉淺。

又 江館聽秋圖爲王塵簠鼎華題予今秋再至武林僑寓吳山時木落江寒
新愁如約倚簫歌此不覺詞之沈鬱也

商聲一片闌宵起。蕭蕭翠梧風颭。警露蛩寒。征霜雁苦。淺夢驚回荒店。腰圍乍減。又
龜赭潮來。枕函微撼。宛轉蘭心。翦燈獨坐。東窗切自賦哀豔。天涯同是倦旅。記吳山
蠟屐。楓老如染。月滿江空。飄迴樹合。把袂年時游覽。青衫試檢。有淚點模糊。酒痕濃
澹。我更添愁。賞秋重繫纜。

東風第一枝 憶梅用蛻巖韻

石屋橫琴。羅浮遲夢。瓊妃休誤輕約。翠禽飛上苦枝。隔離乍舒嫩萼。東風簾卷。正鏡
裏、曉鬢初掠。憶那時、綺袂相逢。驚起睡酣雙鶴。風峭峭、茜裙漸薄。波澹澹、素蟾未
落。浪傳春到江南。忍聽數聲戍角。何郎老去。已換了、朽闌疏箔。待翦燈、橫幅重臨。記
取凍香池閣。

買陂塘 題鮑銘青昌照叩舷覓影圖寓感逝意

倚荃機。采香盈袖。碧雲誰寄芳杜。淩波已斷驚鴻影。何況機羅微步。還憶否。憶解佩湘皋。曾被鴛鴦妒。歡悰易阻。算雙槳移春。一燈煮夢。佳約者番誤。低徊久。怕聽瀟瀟暮雨。浮漚彈指應悟。蘭香恩眷桃花命。佇想又添酸楚。愁不語。任叩徧桐舷。懊惱歌金縷。多情最苦。盼天際螺峯。柳梢蛾月。隱隱露眉嫵。

露華 春日散步小橋流水間見緋桃一株妍媚可愛用玉筍山人韻寫之
洞天未曉。被東風嬾娜。吹醒香魂。洗春雨過。輕盈猶帶啼痕。照水一枝清絕。映夕陽。紅染羅裙。歌扇底。嫣然一笑。未懺情根。休尋去年人面。誤俊侶重來。呵筆題門。鈿車零落。只愁霧暝煙昏。甚日武陵谿上。繫釣篷。歸隱花村。塵夢冷。芳心欲化絳雲。

南歌子

明鏡窺星鬢。疏簾滯雨聲。春陰如墨冒紗幮。一角遙山。不畫黛眉青。舊約聽箏誤。新歡打槳迎。恩恩芳序過清明。懊惱東風。猶未放新晴。

金縷曲 六舟上人達受手拓漢竟寧雁足燈弟廿五墨本爲胡鼻山畫題

翠墨香痕凝。笑攜來、叢殘故紙。竟寧堪證。遺物漢家傳雁足。不數銅荷鳳頸。算玉盃、金甌相並。更有仙人殘鏡在。予藏有漢仙人不老殘鏡一規。照宮妝。一樣如花靚。思往事。淚珠迸。西京舊迹憑誰省。讓山僧、剝苔剝蘚。撫摩宵永。耿耿蘭心含欲吐。鬧煞春蛾弄影。愁不見、玉釵挑醒。笑我青藜光未借。剔昏檠。細字牛毛映。銀蠟燼。夜窗冷。

琴調相思引

縱得相逢已可憐。等閒辜負好華年。思量何事鉛淚溼征驂。私燕水沈香暗祝。願伊成佛我成仙。博山灰。冰心字。一爐煙。

天香 擬宛委山房賦龍涎香用箕房韻

貌鼎溫磨。麝煤暖炷。縈簾一縷雲氣。碎碾冷塵。勻調玉唾。海客爲傳遺製。驪宮月滿。誤喚醒、潛蚪癡睡。迢遞槎程萬里。滄波暗浮煙水。相逢茗餘竹外。沁芳魂。翠屏風細。幾度護春閒試。碧簪斜墜。籠袖餘馨漸褪。渾未減。當年戀香意。漫理瓊籌。濃熏繡

被。

水龍吟 擬浮翠山房賦白蓮用玉田韻

爲誰淨洗鉛華。宵深易泣銅盤露。亭亭玉立。珊珊佩整。霓裳罷舞。月鏡窺妝。冰壺濯魄。盟尋沙鷺。記采香歸也。銀塘路遠。渾不覺。秋來處。仙掌芙蓉休妒。夢梨雲、鴛鴦應誤。芳姿自淡。芳心自潔。一般無語。粉暈微銷。脂痕全褪。待傳豪素。倘相逢。隔浦。明璫解贈。便淩波去。

摸魚兒 擬紫雲山房賦專用碧山韻

翦湘波。翠痕不斷。一池春影搖碎。柔絲裊裊垂釣股。宛轉鯉函題字。看又似。似水面新荷。點點青錢綴。尊前往事。記玉鼓凝香。紅鹽糝雪。相與伴清醉。斜陽外。又聽吳歎。唱起。懷歸翻恨無計。鱸魚菰米依然好。可惜故鄉千里。愁只是。冷一箸秋風。誰識飄零意。江南望裏。指鳧葉銀塘。蘋花芳渚。渺渺隔煙水。

齊天樂 擬餘閒書院賦蟬用紫雲韻

高陽臺 題許邁孫增養庵填詞圖

蕉雨聲稀。梨雲夢淺。疏窗一碧惜惜。搭譜闌宵。拈豪試寫秋心。燈前況有吹簫侶。彈雙鬢、背立花陰。寄相思、一幅蠻箋。幾度沈吟。歡游已阻春婆醒。笑移宮換羽。但抱青琴。舊日樓臺。憐他燕子重尋。梁谿水咽鷗盟冷。弔逋翁、淚灑寒潯。君爲顧兼塘先生入室弟子兼翁嘗爲予評定詞卷甲子過梁谿曾作詩弔之望江南拍徧闌干誰是知音。

菩薩蠻

綠陰如幄春寒淺。東風悄掩重門扇。斜日柳絲飛。春歸人未歸。畫樓凝望久。腸斷休回首。新水碧於羅。奈他雙槳何。

憶舊游 鳳谿秋禊圖爲石仲華芳保題

漸蘋花煙冷。藕葉風欹。涼滿汀洲。未了尋芳興。又琴尊近局。呼起閒鷗。停橈鳳喈橋畔。裙屐少年游。笑禊飲重修。單衫小扇。無限風流。句留泥人處。有勸酒雛鬟。背立